



REPUBLIKA E SHQIPËRISË
KËSHILLI I LARTË I PROKURORISË

Nr. 1551/ Prot.
11

Tiranë, më 30. 06. 2025

VENDIM

Nr. 118, Datë 23.06.2025

**“PËR CAKTIMIN E PËRKOHSHËM NË POZICIONIN E DREJTUESIT TË
PROKURORISË PRANË GJYKATËS SË SHKALLËS SË PARË TË
JURIDIKSIONIT TË PËRGJITHSHËM ELBASAN”**

Këshilli i Lartë i Prokurorisë, i përbërë nga:

1. Mirela BOGDANI	Kryetar
2. Erind GERMENJI	Zv/kryetar
3. Sokol STOJANI	Anëtar
4. Zeqir HODA	Anëtar
5. Arta MANDRO	Anëtar
6. Ledina RIZA	Anëtar
7. Moisi DUDA	Anëtar
8. Vatë STAKA	Anëtar
9. Olger EMINAJ	Anëtar
10. Erind MERKURI	Anëtar
11. Erion FEJZULLA	Anëtar

në mbledhjen e datës 23.06.2025, në përputhje me procedurën e përcaktuar në nenet 159-161, 164 dhe vijues të ligjit nr. 115/2016, “Për organet e qeverisjes së sistemit të drejtësisë” i ndryshuar, nenet 18 e vijues, të Rregullores “Për organizimin dhe funksionimin e brendshëm të Këshillit të Lartë të Prokurorisë”, shqyrtoi çështjen me objekt:

**“Caktimin e përkohshëm në pozicionin e Drejtuesit të Prokurorisë pranë Gjykatës së
Shkallës së Parë të Juridiksionit të Përgjithshëm Elbasan”**

KËSHILLI I LARTË I PROKURORISË:

Pasi mori në shqyrtim Relacionin shoqërues nr. 1551 prot., datë 30.05.2025, të Komisionit të Zhvillimit të Karrierës, me relator z. Sokol Stojani, si dhe referuar bazës ligjore të sipërpërmendur, përfshirë diskutimet në mbledhje mbi çështjen,

V Ë R E N:

1. Këshilli i Lartë i Prokurorisë (në vijim *Këshilli*) është institucioni që garanton pavarësinë, disiplinën, statusin dhe karrierën e prokurorëve në Republikën e Shqipërisë.
2. Me Vendimin nr. 74, datë 26.03.2021, “Për caktimin e z. Kreshnik Ajazi, nëpërmjet procedurës së ngritjes në detyrë, në pozicionin e Drejtuesit të Prokurorisë pranë Gjykatës së Shkallës së Parë Elbasan”, Këshilli ka caktuar prokurorin Kreshnik Ajazi në detyrën e drejtuesit në këtë zyrë prokurorie për periudhën 26.03.2021-25.03.2024.
3. Me Shkresën nr. 8813 prot., datë 11.09.2023 prokurori Kreshnik prokurori Kreshnik Ajazi ka paraqitur kërkesën për rikandidim në pozicionin e drejtuesit të Prokurorisë pranë Gjykatës së Shkallës së Parë të Juridiksionit të Përgjithshëm Shkodër, bazuar në nenin 52, pika 2, të Ligjit nr. 96/2016, “Për statusin e gjyqtarëve dhe prokurorëve në Republikën e Shqipërisë”, i ndryshuar (në vijim *Ligji për Statusin*).
4. Në zbatim të nenit 52, pika 3, të Ligjit për Statusin, të Rregullores “Për procedurën e verifikimit të kushteve dhe kriterëve ligjore për rekrutimin, emërimin si magjistrat dhe caktimin në pozicion të kandidatëve për prokurorë, si dhe zhvillimin e karrierës së prokurorëve”, e ndryshuar, si dhe Rregullores “Për ngritjen në detyrë në shkallët më të larta në prokuroritë e juridiksionit të përgjithshëm”, kur drejtuesi i një zyre prokurorie kandidon për riemërim, ai i nënshtrohet verifikimit të pasurisë dhe figurës nga ana e Këshillit.

Për rrjedhojë, Këshilli ka filluar procedurën për verifikimin e pasurisë dhe figurës për kandidatin që ka kandiduar për riemërim në zyrën e Prokurorisë Shkodër, prokurorin Kreshnik Ajazi, si dhe ka caktuar me short relatorin për këtë procedurë.

5. Kjo procedurë ka përfunduar me Vendimin nr. 26, datë 07.03.2024, “Për verifikimin e pasurisë dhe figurës të prokurorit Kreshnik Ajazi, kandidat për pozicionin e drejtuesit të Prokurorisë pranë Gjykatës së Shkallës së Parë të Juridiksionit të Përgjithshëm Elbasan”, sipas të cilit, prokurori Kreshnik Ajazi ka kaluar me sukses procesin në fjalë.

Me të njëjtin vendim, prokurori Kreshnik Ajazi është lejuar të vijojë procedurat e mëtejshme të ngritjes në detyrën e drejtuesit.

6. Nga ana tjetër, procedura e vlerësimit etik dhe profesional (sipas Vendimit nr. 389, datë 14.12.2023, “Për caktimin me short të relatorit dhe këshilltarit përgjegjës për procedurën e vlerësimit të drejtuesve”), bazuar në Rregulloren “Për vlerësimin etik dhe profesional të drejtuesve të prokurorive të juridiksionit të përgjithshëm” për prokurorin Kreshnik Ajazi, që ka rikandiduar për një mandat të dytë në pozicionin e drejtuesit është ende në realizim e sipër nga ana e Këshillit.
7. Duke qenë se, me Vendimin nr. 49, datë 20.03.2025, “Për caktim të përkohshëm”, Këshilli kishte caktuar përkohësisht që prokurori Kreshnik Ajazi të ushtrojë funksionin



e drejtuesit të zyrës së Prokurorisë Elbasan për një periudhë deri në tre muaj, dhe për shkak se, procedura për vlerësimin etik dhe profesional të kandidatit ende nuk ka përfunduar, Komisioni i Zhvillimit të Karrierës ka propozuar caktimin përkohësisht të prokurorit Kreshnik Ajazi, në pozicionin e drejtuesit në Prokurorinë pranë Gjykatës së Shkallës së Parë të Juridiksionit të Përgjithshëm Elbasan, edhe për një periudhë tjetër deri në tre muaj.

8. Ky caktim i përkohshëm mund të ndërpritet në çdo moment nëse Këshilli vendos riemërimin e tij si drejtues në këtë zyrë prokurorie për një mandat tjetër tre vjeçar.

9. Përsa i takon bazës ligjore, në Nenin 59, të Ligjit për Statusin, parashikohet se:

“1. Pozicioni i magjistratit mund të plotësohet përkohësisht, kur magjistrati me pozicion të përhershëm nuk është në gjendje të ushtrojë funksionin për një periudhë jo më shumë se tre muaj, për shkak të:

a) caktimit në pozicione të tjera,

b) arsyeve të tjera të parashikuara nga ligji.”

10. Ndërsa, në nenin 3, të Vendimit nr. 64, datë 15.04.2019, “Për miratimin e Rregullores “Për caktimin e përkohshëm të prokurorëve”, e ndryshuar, të Këshillit, përcaktohet se:

“1. Prokurori mund të caktohet përkohësisht në çdo pozicion të të njëjtit nivel ose të një niveli tjetër, për të cilin përmbush kërkesat dhe kriteret e parashikuara në ligj për këtë nivel apo pozicion, në të njëjtën prokurori ku ushtron funksionin ose në një prokurori tjetër.

2. Këshilli i Lartë i Prokurorisë respekton për aq sa është e mundur vullnetin e prokurorëve gjatë caktimit të përkohshëm.”

11. Caktimi i përkohshëm i prokurorit Kreshnik Ajazi, në pozicionin e Drejtuesit të Prokurorisë pranë Gjykatës së Shkallës së Parë të Juridiksionit të Përgjithshëm Elbasan për një periudhë të re deri në 3 (tre) muaj siguron në vazhdimësi funksionimin normal dhe mbarëvajtjen e punës në këtë zyrë prokurorie.

12. Për këtë periudhë, prokurori Kreshnik Ajazi do të përfitojë pagën e drejtuesit të zyrës së prokurorisë, sipas ligjit.

PËR KËTO ARSYE:

Bazuar në nenin 149/a, të Kushtetutës, në nenin 59, pikat 1 dhe 4, të Ligjit nr. 96/2016 “Për statusin e gjyqtarëve dhe prokurorëve në Republikën e Shqipërisë” i ndryshuar, në nenet 164 pika 8, 166 pika 2, 184, 189 pika 1, germa “a” të Ligjit nr. 115/2016 “Për organet e qeverisjes së sistemit të drejtësisë” i ndryshuar, si dhe nenin 3, të Vendimit nr. 64, datë 15.04.2019, “Për miratimin e Rregullores “Për caktimin e përkohshëm të prokurorëve”, e ndryshuar, me propozim të Komisionit të Zhvillimit të Karrierës, Këshilli i Lartë i Prokurorisë,

VENDOSI:



1. Caktimin e përkohshëm të prokurorit Kreshnik Ajazi në pozicionin e Drejtuesit të Prokurorisë pranë Gjykatës së Shkallës së Parë të Juridiksionit të Përgjithshëm Elbasan, për një periudhë deri në tre muaj.
2. Për periudhën e përmendur në pikën 1, të këtij vendimi, prokurori Kreshnik Ajazi të paguhet me pagën e pozicionit ku është caktuar përkohësisht.
3. Të njoftohen me këtë vendim Prokurori i Përgjithshëm, Prokuroria pranë Gjykatës së Shkallës së Parë të Juridiksionit të Përgjithshëm Elbasan dhe prokurori Kreshnik Ajazi.
4. Ky vendim hyn në fuqi menjëherë dhe publikohet në faqen zyrtare të internetit të Këshillit.

U shpall në Tiranë, sot më 23.06.2025.

KËSHILLI I LARTË I PROKURORISË

KRYETAR
Mirela Bogdani

ZV/KRYETAR
Erind Germenji

ANËTAR
Sokol Stojani

ANËTAR
Zeqir Hoda

ANËTAR
Arta Mandro

ANËTAR
Ledina Riza

ANËTAR
Moisi Duda

ANËTAR
Vatë Staka

ANËTAR
Olger Eminaj

ANËTAR
Erind Merkuri

ANËTAR
Erion Feizulla